

## II. ԸՆԴՀԱՆՈՒՐ ՄԱՍ

### Բժշկական օգնության և սպասարկման իրականացումը լիցենզավորման ենթակա գործունեության տեսակ է

Համաձայն «Լիցենզավորման մասին» ՀՀ օրենքի 5-րդ հոդվածի 4-րդ մասի՝ լիցենզավորման նպատակը անձանց կյանքին, առողջությանը, գույքին, պետության և հասարակության շահերին, բնության, մշակութա-

յին ժառանգության պահպանությանն առավել վտանգի սպառնալիքով հղի գործունեության տեսակներով զբաղվողների նկատմամբ հսկողության իրականացումն է:

Համաձայն «Լիցենզավորման մասին» ՀՀ օրենքի 43-րդ հոդվածի 2-րդ կետով հաստատված աղյուսակի՝ բժշկական օգնության և սպասարկման իրականացում գործունեության տեսակը ենթակա է լիցենզավորման:

Հայաստանի Հանրապետությունում պետական լիազոր մարմինների կողմից լիցենզավորման գործընթացներն իրականացնելու ընթացքում՝ լիցենզավորման հարաբերությունները կարգավորվում են ՀՀ միջազգային պայմանագրերով, ՀՀ քաղաքացիական օրենսգրքով, «Լիցենզավորման մասին» ՀՀ օրենքով, ինչպես նաև իրավական այլ ակտերով:

Համաձայն օրենսդրության պահանջների, ՀՀ կառավարության կողմից 2002թ. հունիսի 29-ին ընդունվել է թիվ 867-Ն որոշումը, որի Հավելված 5-ով հաստատվել է կազմակերպությունների կամ անհատ ձեռնարկատերերի կողմից բժշկական օգնության և սպասարկման իրականացման լիցենզավորման կարգը (այսուհետև՝ Լիցենզավորման կարգ):

## III. ԱՆՀԱՄԱՊԱՏԱՍԽԱՆՈՒԹՅՈՒՆՆԵՐԻ ՎԵՐԱԲԵՐՅԱԼ ԳՐԱՌՈՒՄՆԵՐ

### Ա. Իրականացված լիցենզավորման գործընթացի տեխնիկական որակավորման պահանջների վերաբերյալ

«Լիցենզավորման մասին» ՀՀ օրենքի 15-րդ հոդվածով սահմանվել է, որ լիցենզավորման ենթակա գործունեության առանձին տեսակների իրականացման համար, եթե պահանջվում է հատուկ տեխնիկական պայմանների առկայություն, ապա լիցենզավորման ենթակա նման գործունեությամբ զբաղվելու համար կարող են սահմանվել կոնկրետ **տեխնիկական պահանջներ և պայմաններ**:

Վերլուծելով ՀՀ կառավարության 29.06.2002թ. թիվ 867-Ն որոշմամբ հաստատված Լիցենզավորման կարգով սահմանված՝ տեխնիկական և մասնագիտական որակավորման վերաբերյալ դրույթների պահանջները, պետք է նշել որ դրանցով սահմանվել են՝

14-րդ կետ.

- բժշկական օգնություն և սպասարկում իրականացնող կազմակերպություններն ու անհատ ձեռնարկատերերը պետք է ապահովեն ՀՀ օրենսդրությամբ բժշկական հաստատություններին ներկայացվող կառուցվածքային, մասնագիտական, ինչպես նաև բժշկական սարքավորումներով ապահովվածությանը ներկայացվող պայմաններին և պահանջներին ու շինարարական նորմերին համապատասխանությունը,

17-րդ կետ.

- բժշկական սարքավորումների օգտագործման ժամկետը չպետք է գերազանցի լիազոր մարմնի կողմից՝ առանձին բժշկական սարքավորումների համար սահմանված ժամկետները,

/նշված դրույթները ուժի մեջ են մտել 15.01.2013թ.-ից ՀՀ կառ. 20.09.2012թ. թիվ 1239-Ն որոշում/:

18-րդ կետ.

-լիցենզավորված անձը լիցենզավորված գործունեությունն սկսելուց առնվազն հինգ աշխատանքային օր առաջ լիազոր մարմին է ներկայացնում կրթության, ինչպես նաև հեղուկության կրթության վկայականի, շարունակական մասնագիտական զարգացման հավաստագրի կամ մասնագիտական գործունեության հավաստագրի պատճենները համաձայն ՀՀ կառավարության **05.12.2002թ. թիվ 1936-Ն** կամ **29.10.2009թ. թիվ 1275-Ն** որոշումների:

**05.12.2002թ. թիվ 1936-Ն** և **29.10.2009թ. թիվ 1275-Ն** որոշումները ընդունվել են համաձայն «Լիցենզավորման մասին» ՀՀ օրենքի 12-րդ, 13-րդ և 15-րդ հոդվածների պահանջների, որոնցով սահմանվել են բժշկական օգնության և սպասարկման համար անհրաժեշտ տեխնիկական հագեցվածության և մասնագիտական որակավորման պահանջներն ու պայմանները,

20-րդ կետ /**Լիցենզիայի մերժման հիմքերը** բաժին/.

-լիցենզիա ստանալու մասին **հայտը մերժվում է**, եթե այն չի համապատասխանում կարգի 14-րդ և 17-րդ կետերով սահմանված լիցենզավորման պարտադիր պահանջներին և պայմաններին:

Համադրելով լիցենզավորող մարմնի կողմից 01.01.2017-01.11.2018թթ. ընթացքում իրականացրած լիցենզավորման գործընթացը վերը նշված Լիցենզավորման կարգի դրույթների հետ, ինչպես նաև ՀՀ օրենսդրության պահանջներին, պետք է նշել, որ.

**Չեն սահմանվել առանձին բժշկական սարքավորումների համար սահմանված օգտագործման ժամկետներ և հնարավոր այլ անհրաժեշտ չափորոշիչներ**

ՀՀ Առողջապահության նախարարությունը, դեռևս 15.01.2013թ.-ից սկսած, բժշկական օգնության և սպասարկման իրականացում գործունեության տեսակի լիցենզավորման գործընթացներն իրականացրել է ՀՀ օրենսդրության պահանջներն անտեսելով՝ մասնավորապես, լիցենզավորող մարմնի կողմից չի իրականացվել ՀՀ կառավարության

29.06.2002թ. թիվ 867-Ն որոշմամբ հաստատված Հավելված 5-ի 17-րդ կետի պահանջը, որի արդյունքում չեն սահմանվել առանձին բժշկական սարքավորումների համար սահմանված օգտագործման ժամկետներ և հնարավոր այլ անհրաժեշտ չափորոշիչներ, որոնց

չբավարարումը, ըստ Լիցենզավորման կարգի 20-րդ կետի 5-րդ ենթակետի պահանջի, հանդիսանում է հայտերի մերժման հիմք:

Լիցենզավորող մարմնի կողմից նշված ժամանակաշրջանում լիցենզավորվող անձանց մոտ բժշկական սարքավորումներով ապահովվածությանը ներկայացվող պահանջները դիտարկել է միայն ՀՀ կառավարության 05.12.2002թ. թիվ 1936-Ն կամ 29.10.2009թ. թիվ 1275-Ն որոշումներով սահմանված տեխնիկական հագեցվածության պահանջների տեսանկյունից:

Նշված որոշումներով բժշկական օգնության և սպասարկման գործունեության առանձին տեսակների համար սահմանված են անհրաժեշտ բժշկական սարքավորումների և պարագաների ցանկը՝ առանց որևէ չափորոշիչների:

Արդյունքում լիցենզավորող մարմնի կողմից իրականացված ուսումնասիրությունների ժամանակ լիցենզավորվող անձանց մոտ փաստվել է միայն բժշկական սարքավորումների **առկայությունը** և դրանց համապատասխանությունը վերը նշված ցանկերին:

---

***Լիազոր մարմնի կողմից Լիցենզավորման կարգի 17-րդ կետի պահանջի չկատարումը, ինչպես նաև չկանոնակարգելը հանգեցրել է մի իրավիճակի, որ լիցենզավորվող անձինք կարող են ներկայացնել /հեղափոխում նաև օգտագործել/ ժամանակակից չափորոշիչներին չբավարարող, բարոյապես մաշված /վաղ արտադրության սարքեր՝ այդ թվում ճառագայթային և այլ սարքեր/, չստուգաչափված և տեղում ժամանակավորապես տեղադրված սարքեր և այլն:***

---

Պետք է նշել, որ վերը նշված մոտեցումը /առանց սարքավորումների համար չափորոշիչների սահմանման/ չի ապահովում «Բնակչության բժշկական օգնության և սպասարկման մասին» ՀՀ օրենքի 2-րդ հոդվածով սահմանված պահանջների իրականացումը: Այսպես, նշված օրենքով սահմանվել են բժշկական օգնության և սպասարկման հիմնական տեսակների նկատմամբ պահանջները՝

ա/ առաջնային բժշկական օգնությունը՝ որպես յուրաքանչյուր մարդու համար անվճար, առավել մատչելի մեթոդների և տեխնոլոգիաների վրա հիմնված բժշկական օգնության և սպասարկման տեսակ, որը երաշխավորվում է պետության կողմից.

բ/ մասնագիտացված բժշկական օգնությունը՝ որպես ախտորոշման և բժշկական առանձնահատուկ մեթոդների ու բարդ բժշկական տեխնոլոգիաների վրա հիմնված բժշկական օգնության և սպասարկման տեսակ:

Պետք է նշել, որ ՀՀ կառավարությունը 27.03.2008թ.-ին ընդունել է «Հայաստանի Հանրապետությունում իրականացվող բժշկական օգնության և սպասարկման տեսակների ցանկը սահմանելու մասին» թիվ 276-Ն որոշումը՝ համաձայն «Բնակչության բժշկական օգնության և սպասարկման մասին» ՀՀ օրենքի 2-րդ հոդվածի պահանջների, վերջինս հիմք է ընդունվել լիցենզավորման գործընթացներում: